



Peter Olsen
Inatsisartunut ilaasortaq, Inuit Ataqtigiit

2020 nallertinnagu ullukinnerup ulloq 21. decembarip pisortatigoortumik nalliussineqartalernissaanik atulersitsinissaq pillugu Inatsisartuni aalajangiiffigisassatut siunnersuut pillugu § 37 naapertorlugu apequtigineqartup nr. 202/2020-p akineqarnera

11-12-2020
Suliap nr. 2020 - 25401
Allagaat nr. 15496988

Postboks 1029
3900 Nuuk
Oqarasuaat: +299 34 50 00
Email: ikin@nanoq.gl
www.nanoq.gl

Asasara Peter Olsen,

Inatsisartut suleriaasiat naapertorlugu apequtinnut qujanaq. Apequtigineqartut tullinguuttuni akissuteqarfigissavakka.

Apeqqut 1:

Siorna 2019-mi qulaani pineqartoq pillugu Namminersorlutik Oqartussaniit malunnartitsisoqanngilaq. Sumik peqquteqarpa tamanna?

Akissut:

Inatsisartut ullormi 28. november 2018 "ullukinneq" pisortatigoortumik ullorsiortarfissatut suaarutigineqarnissaa aalajangerpaat. Tassungalu atatillugu siunertamut aningaasanik immikkut ittunik immikkoortitsisoqassanngitsoq Inatsisartut aalajangerpaat. Ullut pisortatigoortumik erfalasulerfiusartut Ullut erfalasulisaarfissat pillugit Namminersornerullutik Oqartussat nalunaarutaat nr. 26, 11. november 2008-meersumi malittarisassiunneqarput. Ullukinneq decembarip 21-at pisortatigoortumik erfalasulerfiusartussatut allassimavoq, taamaammallu illuutit pisortanit pigineqartut ullormi tassani erfalasumik amusinissaminut pisussaaffeqarlutik.

Pisortatigoortumik erfalasulerfissat nuna tamakkerlugu malunnartinniarneqartarput, taamaammallu Namminersorlutik Oqartussat ullormi taaneqartumi erfalasutik amusarpaat.

UKA2018/166-ip: "2020 nallertinnagu ullukinnerup ulloq 21. decembarip pisortatigoortumik nalliussineqartalernissaanik atulersitsinissaq pillugu Inatsisartuni aalajangiiffigisassatut siunnersuut" oqaluuserineqarneranut atatillugu ullukinnerup nalliussisarnissaanut Aningaasanut Inatsimmi aningaasanik immikkoortitsisoqarsimanngilaq, tamannalu aamma ataatsimiititaliamit inassutigineqarsimavoq. Ullup nalliussinissaanut peqatigiiffiit, suleqatigiiffiit, suliffeqarfiit inuillu ataasiakkaat Tipsernermut Lottornermullu aningaasaliissutini aningaasanik qinnuteqaqqullugit inanneqarput.

Apeqqut 2:

21. decemberip pisortatigoortumik nalliussineqartalernissaa pillugu Naalackersuisut qanoq pilersaaruteqarpat?

- a. 21.juni pisortatigoortumik inuiattut ullorsiorfigisartakkatsit 21.december ingerlanneqartalerniarpa? Naamiuppat sumik tamanna peqquteqarpa?
- b.Kiap/kikkut isumagisussaavaat pineqartup pisortatigoortumik nalliussineqartalernissaata piviusunngortinneqarnissaa pillugu? Namminersorlutik Oqartussat? Kommunitut? Sulisartut Kattuffiata? Imaluunniit inuinnaat namminneq?

Akissut:

Ullormut juunip 21-anut tunngatillugu Inuiattut ullorsiornermup malunnartinniarnissaanut kommunit illoqarfinnut nunaqarfinnutluta ataasiakkaanut peqatigiiffiit allallu soqutiginnittut suleqatigalugit pilersaarutinik suliaqartartuupput.

Kalaallinut kulturikkut nersornaasiuttakkamut ileqqoreqqusani § 2 naapertorlugu Naalackersuisut Inuiattut Ullorsiornermut atatillugu kulturilerisunut nersornaat aamma kajumissaatitut nersornaat tunniuttarpat. Naalackersuisut isumaqarput innuttaasut suliffeqarfiillu namminneerlutik ullut nalliussiffiusut nalliussissallugit, tassungalu atatillugu aaqjissuussinissanut kiffaanngissuseqartut, soorlu tamanna aamma ullormut juunip 21-anut atuuttoq.

Taamaammat Naalackersuisut inuit ataasiakkaat, peqatigiiffiit, suliniaqatigiiffiit, suliffeqarfiit allallu soqutiginnittut ullukinnerup decembarip 21-ata nalliussinissaanut Namminersorlutik Oqartussat Tipsernermut Lottornermullu aningaasaliissutaannit suliniutinut tapiissutinik qinnuteqaqqullugit kaammattorniarpaa.

Apeqqut 3:

21. juni pisortatigoortumik ullorsiorfigisaleratsigu qanoq aaqqitaava?
- a. Qanorlu ililluni ulloq taanna sulinngiffiusussanngorlugu aaqqinneqarsimava? 21.decemberimit allaanerua?
 - b. Aap-iuppat suna taava allaanerussutigivaa?

Akissut:

Ulloq 21. juni Kalaallit inuiattut ullorsiorfigisarpat.

Ulluni 1. maj, 5. juni aamma 21. juni sulisunut Namminersornerullutik Oqartussani aamma Kalaallit Nunaanni kommunit atorfeqartitanut sulinngiffeqarsinnaaneq pillugu Kaajallaasitaq (kaajallaasitaq nr. 3/92) naapertorlugu Kalaallit Nunaanni inuiattut ullorsiorneq nalunaaqutaq 00.00 aamma 24.00 akornanni ulloq naallugu ullortut nalliuttutut isigineqarpoq.

Decembarip 21-at pisortatigoortumik ulluvuq nalliussiffik, taamaammallu ulloq naallugu ullortut nalliuttutut isigineqarnani.

Ullut nalliussiffiusut inatsisitigut nassuiaaffigineqanngillat. Ataatsimiititaliali UK2018/166-imut isumaliutissiissummini tamanna imatut nassuiarpaa: *"Ullorsiorneq ulluvuq, pisimasoq aalajangersimasoq nalliuttorsiorniarlugu imaluunniit sammisaq aalajangersimasoq malunnartinniarlugu nalliussineqartartut. Ullorsiorfiit pilerfimmikkut siunertamikkullu siammarsimasorujussuupput – inuttut ullorsiorfiit politikkikkut, aningaasaqarnikkut imaluunniit upperisarsiornikkut ullorsiorortoqartarluni."*

Apequt 4:

21. juni pisortatigoortumik ullorsiortarfippit sulingiffeqarfiusarpoq. 21. December aamma pisortatigoortumik ullorsiortarfigilernikuugatsigu, taava qaqugu ulloq taanna sulingiffittut atorneqartalernissaa naalakkersuisut naatsersuutigaat.

Akissut:

UKA2018/166-ip oqaluuserineqarnerani decembarip 21-at ullutut sulingiffeqarfissatut atulernissaa siunnerfigineqanngilaq. Tamannalu pissutigalugu decembarip 21-at juunip 21-at assigalugu ullutut nalliuttut atulernissaa pillugu Naalakkersuisut pilersaaruteqanngillat.

Naalakkersuisut paasissutissiissutigisinnaavaat qanoq ilinerani sulingiffeqarsinnaaneq isumaqatigiissutini arlaatigut aalajangersarneqareersimammat.

Apequt 5:

Tassunga tunngasumik allamik Naalakkersuisut ilisimatitsissutissaqarpat?

Akissut:

Naamik.

Inussiarnersumik inuulluaqqusilluta

Katti Frederiksen